

四庫全書

史部

欽定四庫全書

唐大詔令集卷七十七

宋 宋敏求 編

典禮

陵寢下

優勞

高祖山陵畢賜元從功臣及營奉百姓恩澤

詔

宗陵優勞德音

豐陵優勞德音

莊憲皇太后山陵優勞德音

景陵優勞德音

光陵優勞德音

莊陵優勞德音

孝明太皇太后山陵優勞德音

供薦

停諸陵供奉鷹狗詔

九月一日薦衣陵寢詔

親謁

親謁陵曲赦醴泉縣德音

停親謁乾陵勅

謁五陵赦

陵寢下

優勞

高祖山陵畢賜元從功臣及營奉百姓恩澤詔

高祖太武皇帝天縱神武膺籙受圖可久之德格乎區
宇敦睦九族協和萬邦賢能必進德化潛洽革百王之
弊興三代之風地平天成邇安遠肅至德被於四海休
烈光於千載巍巍蕩蕩無得而稱焉朕嗣膺寶祚夙夜
兢惕思述先志被之率土其內外姻戚平生故舊太原
從官人及歷試之所文武僚佐爰洎胥吏往雖每降國
恩恐未周悉或才用不申階品屈滯或家道貧匱子孫

沈淪須有矜量咸欲得所先朝優勞庶政惟以卹民為
本諸州都督刺史政績可稱者具名奏聞其諸州百姓
奉營山陵宜量有蠲免可令有司詳為條例聞奏並務
從優厚稱朕意焉

貞觀元年
十一月

崇陵優勞德音

朕以寡昧嗣膺大業永惟列祖之德肅奉山園之重夕
惕若厲懼有缺遺賴一二元臣公卿庶士叶乃心力克
申典禮今九虞既畢永慕惟深爰奉疇勞之義差其異

數之命山陵使杜祐若子若孫與一人五品正員官禮儀使杜黃裳特加一階與一子六品官副使李鄘按行山陵地副使李扞賜一級各與一子官鹵簿使鄭雲達與一子出身儀仗使昇梓宮官各賜爵一階邑號爵賞優賜有差三京元高陵高陽縣人夫寒凍近道鄰村坊市屋宇什物田苗被毀損并近陵百姓偏有使役委京兆府勘覆聞奏挽卽挽士量加優卹旬內百姓奉山陵秋冬滯雨供應疲弊所配折納和糴並停

永貞元年十一月

豐陵優勞德音

朕聞王者大孝本於無違故由於禮則不僭慎於終則
歸厚國有大事付予冲人永言營奉哀惶靡措雖仰
遵先旨已從儉於因山而俯徇究荒實載勤於復土况
七月之會萬方必臻有供億之繁有車騎之雜賴上天
垂祐庶務肅成文武盡哀敬之容道路無風雨之氣粵
自遷座至於返虞人之叶從禮無違者此皆一二輔弼
洎左右之臣至於庶寮罔不盡力朕所加歎不忘於懷

宜酬厥庸以序功次其山陵使宜與一子七品正員官
山陵禮儀使及陵所攝太尉行事官與一子八品正員
官山陵副使兵部侍郎判度支李選禮部侍郎崔頌按
行山陵地使並賜一級挽卽及諸司職掌工巧雜役人
夫車牛並詢其勞績扶以等級賜官及出身賜勳爵進
階減勞選各有差

元和元年

莊憲皇太后山陵優勞德音

孝本因心自天子而下達禮當從祔由聖人而設範朕

以寡祐夙罹憫凶追攀弓劍閉橋山而未幾永慕禕翟
合源陵於此時昊天罔極追感無已俾竭誠敬用申哀
懷而冢臣大僚庶尹羣吏靡不夙夜展布勤勞備物之
容既陳嚴奉之敬斯在始終罔替差次宜勞式舉彝章
俾新渥澤山陵所攝太尉行事官與一子七品正員官
山陵禮儀使與一子八品正員官山陵副使賜爵一級
其下優賜各有差園林所在供役為勞憫茲充奉之勤
宜頒施舍之令其富平縣今年夏稅除折諸色價及已

徵納青苗錢除已捐外並宜放免

元和十一年九月

景陵優勞德音

勅朕聞孝莫大於慎終仁莫先於卹下慎終故勿之有
悔卹下固可使忘勞自陵寢戒期郊甸充奉屬春耕肇
起宿麥繼登百役所集羣司所備上懼一物之遺缺既
懷罔極之誠下厯兆人之疫瘵又思不擾之德方將號
從靈駕親至山園情為事奪竟不獲遂賴一二元輔洎
內外庶官嚴敬協心克修典禮永言嘉歎感咽增懷義

有必酬式舉勞以申命惠無不浹仍蠲賦以加恩山陵
使兼陵所攝太尉行事官與一子六品正員官山陵禮
儀使與一子八品正員官山陵副使柳公綽按行山陵
副使李翻並賜爵一級各與一子出身橋道置頓使賜
爵一級仍與一子官內山陵使賜絹一百疋特加一階
山陵修築使賜絹七十疋特加一階監修橋道使賜絹
七十疋內按行山陵地使賜絹五十疋內山陵副使及
修築副使各加一階鹵簿儀仗並賜一級各與一子出

身橋道置頓使各加兩階昇梓宮三品以上賜爵兩級
四品五品賜爵一級六品以上各加一階其中有合選
人前資見任各減兩選神策六軍修築山陵官健各賜
絹兩疋其檢校軍使及押當所由四品以上賜爵一級
仍加一級五品以下各加兩階陵所造作押當使等三
品四品各加兩階仍賜爵一級五品以下各加兩階其
中正員六品以下合選人前資見任各減三選白身各
賜勳三轉諸司諸使應緣山陵修造及專知修造作并

諸色檢校執當官典白身及直司掌上巧兒工匠等五品以上各加兩階六品以下各加一階合選人前資見任各減兩選白身各賜勳兩轉其給直和雇者不在此限吉凶儀仗諸色行從官等五品以下各加一階至三品五品未合叙者賜爵一級六品以下各加一階如其中有合選人前資見任各減一選諸司諸使押管當官置頓舉幕往來檢校軍將中使等五品以上六品以下並加兩階白身各賜勳兩轉合選人前資見任各減兩選

太極宮宿衛官及中使大內皇城留守及押當官等五品以上各加兩階六品以下各加一階白身各賜勲兩轉撰謚冊哀冊謚議書冊文及讀謚冊哀冊書寶讀寶官等五品以上賜爵一級六品以下各加一階合選人前資見任各減一選鑄造寶冊裝冊及檢校官五品以上各加一階六品以下各賜勲兩轉合選人前資見任各減一選題木主官加一階昇寶冊官五品以上各加兩階六品以下各加一階其中合選人前資見任各減

一選押鹵簿儀仗挽卽等見任者各加兩階合選人前
資見任各減兩選山陵禮儀橋道置頓判官五品以上
各賜爵一級仍加一階六品以下各加兩階其山陵使
司官與軍將加一階合選其知東渭橋官非時放選仍
優與處分知道官前資見任各減三選知頓官前資見
任各減兩選按行陵地儀仗鹵簿判官及諸副使判官
並諸司諸使監當雜職掌官吏等五品以上各加兩階
六品以下各加一階合選人前資見任各減兩選白身

各賜勲兩轉其挽卽放出身後七選許集挽士代哭挽歌等各減三年勞合選者各減兩選無勞可減者各賜勲兩轉京兆府及諸州縣斷玄宮石匠及宮寢作頭巧兒雖給庸直就中辛苦各賜勲一轉諸色行事官及齋卽禮生并陰陽官三品以上各賜爵一級四品以下各加一階合選人前資見任各減一選白身各減二年勞考滿人放出身其數處職掌任取穩便從一項處分應緣二仗三衛彊騎及諸色人匠并緣山陵應役人夫車

牛等各委本府長官本軍本使本司量事優賞諸道應副山陵叅佐軍將等各加一階諸色職役官吏應或減還可減者宜令所司非時與處分如有諸色流外充者各於本色中量減二年勞無勞可減者選日優與處分京兆府今年夏青苗錢應合徵共八萬三千五百六十貫文並宜放免仍委令狐楚便以山陵用不盡綾絹依實支付京兆府充代百姓納青苗錢其近迫鄉村坊市屋宇什物田苗等有被損毀并近陵百姓偏有使役理宜

節級優賞並委京兆府審細勘覆聞奏應隨靈駕挽卽
挽士諸色人夫等泥雨中不免損傷委京兆府審細訪
姓名聞奏量加優恤其山陵禮儀鹵簿儀仗使并諸軍
諸使諸司將官吏如執當務重功效尤異委本軍本司
本使其名聞奏中書門下商量奏聽進止宣示中外咸

使聞

元和十五年
六月十九日

光陵優勞德音

朕孤藐惟疾慈嚴早違靡日不懷終天無逮將欲躬護

園寢哀達神明而公卿庶寮瀝懇伏奏迫以重義奪予
至情是賴一二鼎臣凡百執事咸竭嚴奉各表哀敬百
靈供衛六合會同終始四時無爽違之憾徃復千里免
塗潦之虞感歎盈懷是中勞典既加恩以頒錫遂流澤
以蠲租山陵使禮儀使兼陵所攝太尉行事官各與一
子七品正員官仍特加一階山陵副使按行使並賜爵
一級各與一子出身橋道置頓使賜爵一級與一子官
內出山陵使兼賜修橋道使賜絹一百五十疋銀器二

事特加一階修築使賜絹七十疋特加一階按行使賜絹五十疋特加一階修築副使賜絹三十疋加一階鹵簿使儀仗使並賜爵一級各與一子出身橋道置備副使各加兩階昇梓宮官三品五品賜爵一級六品以下各加一階神策六軍修築官健及檢校軍使陵所造作押當官吏及中使等并諸司諸使應緣山陵修道造作及專知執當工匠等賜物加階爵咸選有差吉凶儀使諸色行從官等五品以上各加一階如已至三品五品

未合叙者賜爵一級六品以下各加一階撰哀冊書寶
讀寶官等五品以上賜爵一級六品以下各加一階并寶
冊官及橋道置頓官儀仗鹵簿使判官等各賜階級勳
改選減有差其挽卽放出身後七選許集南郊及太尉
侍中告諭冊謚寶靈座前進謚寶奏外辨奠玉幣酌獻
等各賜爵兩級餘減勞考有差其數處職掌任所使從
一司處分奉先縣營奉力役勞敝極深來年夏青苗錢
宜令放免櫟陽美原尚陵富平來年夏青苗錢每貫放

二百文不滿貫者每百放二十文仍委逢吉與府司計
科便以山陵用不盡錢與填所放錢數其近道鄉村坊
市屋宇什物田苗等有被毀損并近陵百姓偏有役使
理宜節級優賞並委京兆府審勘聞奏

長慶四年十月

莊陵優勞德音

禮重節終義崇敦孝克勤奉卹之志用申罔極之感斯
固寅亮輔臣奔走多士效其忠力濟是儀章俾弘加勞
之澤庶表心誠之報應緣莊宮奉其山陵使與一子七

品正員官仍特加一階山陵副使按行山陵地使並賜爵一級各與一子出身橋道置頓使賜爵一級仍特加一階內山陵兼監修橋道使賜絹一百五十疋銀器二事特加一階內按行山陵副使賜絹五十疋特加一階山陵修築副使賜三十疋加一階鹵簿儀仗使並宜賜爵一級各與一子出身橋道置頓副使加兩階昇梓宮官三品以上賜爵二級四品賜一級陵所作押當官及中使等三品四品各加兩階吉凶儀仗諸色行從官

等各加一階太極宮宿衛官及中使大內皇城留守并
押當官等五品以上各加一階撰哀冊謚議謚冊官各
賜爵一級書冊及讀哀冊書寶官等五品以上賜爵一
級六品以下各加一階鑄造寶冊裝寶冊裝寶及檢校
官五品以上各賜勳兩轉中書門下儀制官題主官界
寶冊官五品以上各加二階六品以下各加一階山陵
使禮儀使判官各特加一階五品以上仍賜爵一級其
專知橋道官考滿日放選其知東渭橋官非時放選仍

優與處分知道路官各減兩選知頓官各減三選按行
山陵使儀仗鹵簿使判官并諸色諸使監掌雜職掌官
吏等各加二階挽卽放出身後七選許集南郊及太極
殿攝太尉侍中告謚冊寶及靈座前進謚寶奏外辨奠
玉幣酌獻等官賜爵兩轉其山陵禮儀鹵簿儀仗等使
并諸使諸司軍將官吏如執當務重功效尤異制勅中
不該者委本司官吏本司具名聞奏中書門下奏聽進
止其三原縣百姓今年秋青苗錢並放免其高陵縣量

放一半

太和元年八月

孝明太皇太后山陵優勞德音

門下園陵之重典禮是崇故憲章既盡於舊儀嚴奉式
遵於古訓載深追感用切哀懷公卿大臣洎百執事竭
忠體國宣力叶心誠敬有加恭恪無懈永告勤瘁宜洽
優恩山陵使所攝太尉行事官與一子九品正員官山
陵禮儀使與一子出身內山陵副使昨者責辦事重與
一子出身山陵使加一階仍賜物四十疋副使二十疋

判官十疋山陵監修橋道使賜物四十疋判官各十疋
內山陵副使加一階仍賜物四十疋判官各十疋山陵
置頓橋道使與一子出身副使加兩階判官巡官巡檢
專知官各加兩階合選人前資見任各減兩選鹵簿使
賜爵一級儀仗使加一級陵所造作押當官及中使等
三品以上賜爵一級四品以下各加一階其中正員六
品以下合選人前資後任各加兩選白身各賜勳兩轉
諸司諸使應緣山陵修造及專知造作諸色檢校執事

當官白身及直司掌上巧兒工匠等五品以上加一階
六品以下各賜勲兩轉合選人前資見任各減一選白
身各賜勲一轉其給直和雇者不在此限吉凶儀仗諸
色行從官等五品以上各加一階如已至三品未合叙
者賜勲兩轉四品以下各加一階諸司諸使押當官置
頓營幕往來檢校軍將中使等五品以上六品以下並
各加兩階白身各賜勲一轉合選人前資見任各減一
選兩儀衛官及中使大內皇城留守并押當官等五品

以上六品以下各加一階白身賜勲兩轉撰謚冊哀冊
謚議書冊及讀謚冊書寶讀寶官等三品以上賜爵一
級四品以下各加一階鑄造冊寶裝寶及檢校官五品
以上各加一階六品以下各賜勲兩轉合選人前資見
任各減一選題本主官加一階昇寶冊官及舉寶官五
品以上各加一階六品以下各賜勲兩轉其中合選人
前資見任各減一選押當鹵簿儀仗挽卽各加一階合
選人前資見任各減一選山陵禮儀置頓使判官各加

兩階合選人前資見任各減兩選儀仗鹵簿使判官及諸副使判官并諸司諸使監當雜職掌官吏等各加一階白身各賜勲兩轉挽即放出身後七選許集挽士挽歌等各減一半勞合選者前資見任各減一選無勞可減者各賜勲兩轉諸色行事官及齋即禮生并陰陽生三品以上各賜爵一級四品以下各加一階合選人前資見任各減一選白身各減二年勞考滿人放出身其數處職任取穩便從一頭處分應緣儀仗三衛彊騎及

諸色夫匠代選并緣山陵應役人夫車牛等各委本府
長官本軍大使本司量事復賞太常禮直官及中書門
下儀制官主務皆重事無遺闕特加一階如先已加階
者委中書優與進擬諸道應奉使赴山陵幕府軍將等
各加一階諸色職掌官吏中應合減選人如無選可減
者令所司非時與處分如有諸司流外充者各與本色
中量減一半勞無可減者優與處分充寢陵勞役實繁
新澤所沾異渥斯及其奉先縣宜放今年夏稅青苗錢

如已有諸色折納者即放於秋稅斛斗據數矜免布告

中外稱朕意焉

咸通七年
六月八日

供薦

停諸陵供奉鷹狗詔

園陵之地衣冠所遊凡厥有司罔不祇事禮存則先型
是訓禮失則後代何觀惟懷永圖敢忘舊典頃者別致
鷹狗供奉山陵至於料度極多費損况昔誠禽荒既非
尋常所用遠惟龍馭每以仁愛為心彼耕象與耘鳥且

增哀慕豈飛蒼而走黃更備畋獵有乖儀式無益崇嚴
載懷虧紊良深悚惕諸陵所有供奉鷹狗等並宜即停

開元二
年四月

九月一日薦衣陵寢制

禋祀者所以展誠敬之心薦新者所以申霜露之思是
知先王制禮蓋緣情而感時朕纘承丕業肅恭祀事至
於諸節當修薦享自流火屆期商風改律載深追遠感
物增懷且詩著授衣令存休澣在於臣子猶及思私恭事園

陵未標典式自今以後每至九月一日薦衣於陵寢貽
範千載庶展孝思且仲夏端午事無故實傳之淺俗遂
乃移風况乎以孝導人因親設教感游衣於漢紀成獻
服於禮文宣示寮庶令知朕意

天寶二年八月

親謁

親謁陵曲赦醴泉縣德音

朕恭膺大寶嗣隆景業虔奉成則光闡洪休昧旦兢懷
宵分動慮蒼旻垂祐宗社降靈順黎元之心藉忠賢之

力俗登仁壽道暨升平遠肅邇安時康俗阜履端授節
陽和肇氣親率庶僚奉謁陵寢遺弓茹慕切終身之憂
撫鏡纏悲興寒泉之思敬深如在哀隆罔極薦享既畢
情理獲申式表因心宜弘凱澤可曲赦醴泉縣并行從
人大辟罪以下皆赦除之百姓免今年租調左監門員
外將軍常基在此宿衛進爵一等陵令陵丞各加一階

並節級賜物

永徽六年正月

停親謁乾陵勅

蘇頌

勅昔有獻高寢禮遵於仲月將上原陵薨達於中夜所以銜悲罔極申敬如在鑒於前史抑有舊章朕以寡昧早罹酷罰屬遠安邇肅慶承於七廟霜來露往感積於四時頃迴旆洛師停輿京邑蓋非省風俗希先王猷后之言伏以瞻山園奉聖人因親之教有司已具成命必行渭北衣冠預嚴於法駕陵東松柏傍蔭於清道先陳翼翼之詩後展蒸蒸之慕孟冬戒序計日數程義在因心不忘寢寐但以近郊井隧年時水旱賦於納秬未

瞻規田取贍彼盈箱曾徵實廩而公卿常伯獻書立議
咸以為明察敬事撫臨愛育若萬乘不備其禮故非敬
也百姓不勝其勞故非愛也况駿奔執豆夙事於象居
攀戀遺弓載勤於奉邑以眇身之兼願殊先志之恤隱
是則乖於濟物咎必在予所不忍言諒非獲已俯順眾
情逾增遠思前以今年十一月二十日親謁乾陵者且

停

景龍三年
十月十日

謁五陵赦

祀之大者莫尊於嚴享德之至者莫加於孝敬故周廟
頌思文之章漢陵躬展事之禮因心斯在敢不肅祗我
國應天受期駿惠丕命繼武宗文之德重熙累洽之盛
故以道高系表首冠帝先朕以眇身獲保鴻業往屬多
難時逢國屯推戴神宗纂復興運允迪前烈載康兆人
皆仗卿士之叶謀人祗之道贊豈伊薄德敢承天休露往
霜來久積園陵之思秋嘗夏禘幸思孝享之誠乃夏朔
之辰祥芝產於太室及秋吉之日珍木瑞於神宮對月上

靈拜茲嘉貺，頃秋稼未實，民力尚勞，每事害農，豈惟在予一人之責？因親設教，恐違先旨，隱恤之方，今三時已和，百禮斯洽，崇牙宿設，萬儻在庭，敬爾神工，駿奔執豆，蠲潔為禱，明德惟馨，有來雍雍，載懷怵惕之思，至止肅肅，如聞歎息之聲，降格有終，纏感罔極，闕宮鬱壘，原廟衣冠，或將親掃，松柏用仰，崇飾增嚴，瞻弓劍而莫及，捧鏡奩而嗚咽，始自橋岳，終奉梁山，紫氣昇於舊原，甘露徧於陵樹，白兔馴擾，瑞草呈祥，恭惟昭陵載感，王業

肆台小子夙奉睿圖及齋誠虔誠率祇祀典聖容昭見
靈跡尤彰每四方多虞中國有事雖升龍已遠而躍馬
如神及配奠壽宮親聞忪躍幽明合慶今古未聞蓋皇
天眷於我唐神心昌於後嗣延祚之祉豈獨在予一人
錫類之恩宜廣覃於四海可大赦天下自開元十七年
十一月二十二日昧爽以前大辟罪以下罪無輕重已
發覺未發覺已結正未結正繫囚見徒常赦所不免者
咸赦除之自天寶以來有雜犯經移近處流人並配隸

磧石瓜州者朕捨其舊惡咸與惟新並宜放還其逆黨
緣坐長流及城役量移近處編附為百姓左降官量移
近處官人有亡官失爵齒力未衰者量加收錄百姓無
出今年地稅之半如已徵納聽折通租懸調在百姓腹
內者一切放免孝子順孫義夫節婦旌表門閭終身勿
事諸州侍老百歲以上賜綿帛十段九十以上賜五段
八十以上賜三段獻陵定陵官使并管陵縣官各加一
階陵戶各並放從良終身灑掃陵寢仍每陵取側近百

姓六鄉以供陵寢永勿徭役自古帝王賢臣將相陵墓
宜令所在州縣致祭内外文武官三品以上加爵一級
四品以下各賜一階亞獻太子鴻賜物二千疋終獻慶
王潭賜物一千疋邠王守園各一所并量賜奴婢等其
道士女道等既先令司封檢校不須更隸宗正司所置
崇玄置署宜停古之制禮祭用質明義兼取於尚齒情
實緣於既沒我聖祖湛然常在為道之宗既殊有盡之
期須展事生之禮自今以後每於聖祖宮昭告宜改用

卯時以前行禮朕深惟復朴將致無常在理難明玄風未暢不有時習焉能化成自今以後每至三元日宜令崇玄館學士講道德經羣公百辟咸就觀禮庶使軒冕之士盡弘南郭之風寰海之內咸為大庭之俗其崇玄學士補置猶近於經術或未精通又屬初宗聖號親行典冊宜弘勸獎以示恩惠至舉口試及佔并策各減一條三年業成始依常式其崇玄館大學士宜賜物一百疋學士賜六十疋直學士四十疋宮內先配住道士各

賜二十疋仍令所司具作條件處分宣布中外令識朕
懷主者施行

唐大詔令集卷七十七

欽定四庫全書

唐大詔令集卷七十八

宋 宋敏求 編

典禮

追尊祖先

追尊玄元皇帝制

追尊先天太皇德明興聖皇帝等制

上聖祖大道玄元皇帝號并五聖加謚制

加謚祖宗

謚議

順宗加謚至德弘道大聖太安孝皇帝議

憲宗加謚昭文章武大聖至神孝皇帝議

文

聖祖大道玄元皇帝加號冊

高祖神堯大聖皇帝加謚冊

太宗文武大聖皇帝加謚冊

高宗天皇大聖皇帝加謚冊

中宗孝和大聖皇帝加謚冊

睿宗玄真大聖皇帝加謚冊

赦

加祖宗謚號赦

國忌

國忌在近進蔬菜詔

增忌辰設齋人數勅

廢國忌日行香勅

追尊祖先

追尊玄元皇帝制

東臺大道混成先二儀以立稱至仁虛已妙萬物以為
言粵若老君朕之本系爰自伏羲之始洎乎姬周之末
靈應無像變化多方遊元氣以上昇感星精而下降或
從容宇宙吐納風雲或師友帝王丹青神化譬陰陽之
不測與日月而俱懸屬交在辰晦迹柱下大弘雅訓垂

訓將來雖心齋於太虛而理歸於真宰若夫絕聖棄智
安排寡欲寂寞窅冥之際希夷視聽之表澹爾無為脩
然自得酌之不竭用之不盈執大象而還淳滌玄覽而
遣累邈乾坤而長久跨陶鈞以亭育至矣哉故無得而
稱也况大道所宣克昌寶祚上德所履允屬休期朕嗣
膺靈命撫臨億兆總三光之明而宿宵夤畏居四大之
重而寢興祇惕盡孝敬於宗祧罄懷柔於幽顯行清靜
之化成太平之業登介丘而展采坐明廷而受記非烟

結慶重輪降祥鶴應九歌山稱萬歲越振古而會休徵
冠帝先而為稱首大禮云畢迴輿上京駕駐瀨鄉躬奠
椒糝仰瑞光而延佇挹神泉而永嘆如在之思既深敬
始之情彌切宜昭元本之號以章玄聖之功可追上尊
號曰太上玄元皇帝祠堂廟宇並令修創廟制令丞以
供薦饗仍改谷陽縣為真源縣宗姓特給復一年冀崇
追遠之懷用申尊祖之義主者施行

乾封元年二月二十日

追尊先天太皇德明興聖皇帝等制

門下庇人生者必崇於大道受成命者實賴於前列恭
惟大聖祖玄元皇帝道光太極首出渾元弘敷妙門廣
化真理雖乘時御氣已昭昇於上清而儲祉發祥每敷
祐於來裔祚我寶運格於皇天爰自創業迨於茲歲頻
彰景貺屢覩真容使夫天清地寧物阜民庶六氣時若
四夷來王聖感之祖也至道之應也成功不宰豈假於
強名降福無疆敢忘於昭報是用薦徽號增禮冊蠲潔
以盡敬躬親以致誠亦既昭格良深感慶交至宜因展

事更廣揚名夫聖人之生乃先天地應變無體其猶龍
馬雖窅冥之物不知誰何而誕靈之後示必有先聖祖
父母著在圖籍毋益壽氏已崇徽號曰先天太后父周
上御史大夫敬追尊為先天太皇仍於譙郡置廟自餘
一事以上准先天太后例昔契敷五教殷以為祖稷播
百穀周以配天况咎繇邁種黎人懷德我之本系千載
彌光敬追尊為德明皇帝涼武昭王朕十一代祖也積
德石地炳靈中葉奄有萬國兆先帝功敬追尊為興聖

皇帝其靈側近仍並禁樵牧春秋二時脩禮致祭且聖人所理本在諸天將欲降靈固欲取象况為帝號豈可名宮其玄元宮西京宜改為太清宮東京改為太極宮天下諸郡改為紫極宮兩京宮內道士宜先抽有道行者一十人自餘於新度人中簡擇取添滿三十人為定額仍各賜近城莊田冊禮宜令所司即詳定儀注聞奏上聖祖大道玄元皇帝號并五聖加謚制

握乾圖者必稟於元命宗道本者允屬於強名是知物

通昭感之德報功尊祖貴叶崇之義朕祇荷丕業恭臨
大寶何嘗不宵衣滌慮菲食齋心奉玄聖之範為蒼生
以祈福自頃昊穹眷命天道降休玉芝再產真容累見
嘉應荐來罔知攸荅豈謂玄記陰騭秘謀混成懸想造
化之源密紀景靈之度慶崇真錄昭錫朕躬初驗神傳
竟彰天授幽深累跡既殊於人代朴畧竒象固絕於名
言緬覲皇圖欽承道寶有寅畏增深思申嚴敬之誠以
崇廣大之業謹上玄元皇帝仍以來月五日朕親奉冊

禮國家文祖神宗重熙累洽無為之訓垂祐清靜之德
在人慎寧後昆累承大業是用欽玄符之景命歸清廣
之延祥稟慶真源光昭聖烈謹上高祖神堯皇帝尊謚
曰高祖神堯大聖皇帝太穆皇后竇氏尊謚曰太穆順
聖皇后太宗文武聖皇帝尊謚曰太宗文武大聖皇帝
文德聖皇后長孫氏尊謚曰文德順聖皇后高宗天皇
大帝尊謚曰高宗天皇天聖皇帝大聖則天皇后武氏
尊謚曰則天順聖皇后中宗孝和皇帝謚曰中宗孝和

大聖皇帝和思皇后趙氏尊謚曰和思順聖皇后睿宗
大聖真皇帝尊謚曰睿宗玄真大聖皇帝昭成皇后竇
氏尊謚曰昭成順皇后肅明皇后劉氏尊謚曰肅明順
聖皇后庶彰祈精之感降貽厥之元符聿修誠敬達孝思
於罔極更以來月五日於太清宮前恭禮寧王憲薛王
業各賜物八百疋忠王浚棣王洽鄂王滉光王浚等各
賜物七百疋中書門下賜物五百疋開府王毛重賜物
三百疋皇親五等以上諸親三等以下及文武百寮各

賜有差自古明王因心以待人由已以施物故休戚共而憂樂同也中書門下丞相尚書開府王少大將軍父賜三品官九品三監十二衛監軍羽林軍五省官三府戶大都督府長史父各贈四品官以上清官父各賜五品官凡所贈官宜兼贈母邑號俾夫羣臣受策上延父母先帝遺澤下及幽明興言及此良多感嘆羣臣一體榮辱是同龍蛇之歌古今作式其唐隆元年兩營立功官三品以上與一子官其四品以下選日優與進改京

全唐文卷之八十二
卷七十八
北府供頓免今年地稅諸道戰亡人家仰州縣存恤不
支濟者量事賑給諸軍健兒別勅行人各賜勲兩轉

加謚祖宗

謚議

順宗加謚至德弘道大聖大安孝皇帝議

臣融議曰王者則高明以茂育法博厚而含弘象日月
以照臨如雨露而膏澤謚以令德昭於至公即軒轅顓
頊文武王是也其有褒旌未副則宜增美尊名伏惟

順宗至德大聖大安孝皇帝道合二儀明齊兩曜恩沾萬物信若四時始位踐重光名高少海寢興有度視聽必端昔德宗駐蹕奉天禮行巡狩掃除兇寇實賴春闈每誓衆之初而吐言激切及撫軍之際皆感動師人洎車馬還都歡娛宮禁朝夕視膳晨昏問安是居承華毓德望苑日彰孝愛三十七齡三善益表於元良六氣忽嬰於沉痾德宗以龍樓重嗣惟疾之憂醫藥躬勞至於大漸順宗昭事德宗之節也詢古無對德宗鍾念順宗

之至也前史莫倫父子之親君臣之義垂榮萬國流慶
千年及歷數自天統承丕構不敢牢讓方遵永圖師唐
虞之仁以覆幬天下纂禹湯之化以煦育黎元薄賦蠲
逋宥刑恤隱深仁降感沛澤旁敷減去宮人斥絕竒貢
臨軒廣愛焚鳩毒於通衢凭檻興仁放猛鷙於維繫歸
功臣之甲第而中外謳歌黜殘酷之劇吏而遠近欣服
虔恭九廟睠佑萬邦宵旰勤劬詎思頤衛於是託付冢
嫡壯乎皇猷以明繼明以聖傳聖孝德垂名於不朽睿

謨貽慶於無疆是生聖明收復河隴刷百載失地之恥
滌八聖強鄰之羞陛下不有其功美歸祖考追加尊謚
用重鴻名易曰天地之大德曰生聖人之大寶曰位經
曰德者同於德道者同於道謚法曰寬裕和平曰安克
慎所安曰孝伏惟順聖皇帝端拱造物秉運統天可謂
至德也感神翊運光明正位可謂大聖也永圖丕構傳
聖和保可謂大孝也臣融定加謚號謹上尊謚曰至德
弘道大聖大安皇帝謹議

憲宗加謚昭文章武大聖至神孝皇帝議

臣融議曰皇莫尊乎義軒帝莫大於堯舜咸有上謚光
昭厥猷光德崑崙徽美未稱則必追加大號式重鴻名
伏惟憲宗神章武孝皇帝神授英明天假文武德惟孝
養仁著君臨功格玄穹道孚皇極詞懸日月學與乾坤
揚十聖之耿光冠百王之丕績伏以天寶之末大歷之
中郡國有倔强之臣朝廷行姑息之令所以李錡拒命
自於宗枝劉闢稱兵起於儒吏伏惟憲宗皇帝上遵太

宗之法次覽軒后之書親近正人委任輔相修明綱紀
震動雷霆剪滅渠魁征討叛亂無職不舉無賢不庸將
靖萬方用清四海號令必一視聽無私故得夏臺伏鎖
於沙陲上黨受擒於城鎮西蜀獻俘而玉京正法東吳
納寇而金陵廓開郟城纔下而申蔡削平鄆帥就誅而
齊魯盡復皇威遠振神筭無遺時也滄景屏息以朝天
易定束身而納地海內無事天下一家萬國來賓百蠻
向化方興謀於戎狄深注意於河湟伏以疆土開拓而

有時腥膻冠帶而有日逐覩赫奕休烈留付中外實主
有明聖乘以英運睿謀心課越古超今陛下不有其功
歸於先志揭茲上善既讓於天能光祖宗繼述前聖昨
者丞相卿士請加鴻名陛下固秉冲謙再三不允今追
尊祖考榮冠禹湯伏惟憲宗神聖章武孝皇帝乃聖乃
神乃武乃文盛德大業經天緯地記曰武王周公其達
孝矣乎詩曰文王受命有此武功臣融定加謚號謹上
尊謚曰昭文章武大聖至神孝皇帝謹議

閏十一月十七日宰臣於延英殿面奉聖旨收復河湟
繼述先志將欲尊順宗皇帝憲宗皇帝

右兵部尚書歸融奉閏十一月二十三日勅牒差臣
定謚號者學慙淺薄文愧空虛先聖尊號謬膺論議
不敢不罄竭愚悃上副天心今謚號曰已成謹輒進
順宗皇帝謚號一卷憲宗皇帝謚號一卷並各封進
無任云云謹具如前勅旨敬依典禮不任摧感宜付
所司

冊文

聖祖大道玄元皇帝加號冊

維天寶八載歲次己丑閏六月癸亥朔四日景寅曾孫
嗣皇帝臣隆基奉冊大聖高祖玄元皇帝臣聞有萬物
者本乎大道稱謂所極乃強名焉通三才者存乎大寶
敬教所底唯崇號焉伏惟象帝啟元猶龍表聖應代降
跡立言垂範冲用之功覆幬於天地普救之德亭毒
於生靈委裕邦家克保丕業顧以眇躬纘承玄緒永惟

數祐以致太和頃者玉芝再產玄記陰騭是用恭膺景
命肅事鴻名既刻元辰薦彰嘉貺則有卿雲散彩瑞日
重輪欽承降鑒載深兢惕謹上加尊號曰聖祖大道玄
元皇帝伏惟昭膺盛典永貽休烈

高祖神堯大聖皇帝加謚冊

維天寶八載歲次己丑閏六月癸亥朔四日景寅孝曾
孫嗣皇帝臣隆基敢昭告於高祖神堯皇帝伏惟乾坤
合德歷數在躬俯順人心肇興王業濟生靈於塗炭弘

至理於馨香四海樂推百蠻稽服故得應圖協緯開國
造邦顧以眇德纘承丕緒永惟孚祐以致太和頃者玉
芝再產玄記陰隲欽承景命肅事鴻名既刻元辰薦彰
嘉應則有卿雲散彩瑞日重輪恭惟降鑒載深兢惕謹
上加尊謚曰高祖神堯大聖皇帝伏惟俯鑒虔誠昭升
盛烈祇奉典冊伏增感慰

太宗文武大聖皇帝加謚冊

維天寶八載歲次己丑閏六月癸亥朔四日景寅孝曾

孫嗣皇帝臣隆基敢昭告於太宗文武大聖皇帝伏惟
英喆自天應期撥亂翼戴元聖大拯橫流九服載安百
蠻俾乂功冠開闢德被生靈故干戈之動叶於湯武文
章之盛縣於日月克昌大業永建皇圖顧以眇身祇膺
寶命恭惟孚佑以至和平頃者玉芝再產玄記陰騰是
用欽承丕祉肅事鴻名既刻元辰薦彰嘉應則有慶雲
散彩瑞日重輪永惟降鑒載深兢惕謹上加尊諡曰太
宗文武大聖皇帝伏惟俯睭虔誠昭升盛烈祇奉典冊

三十一
卷七十八
伏增感慰

高宗天皇大聖皇帝加諡冊

維天寶八載歲次己丑閏六月癸亥朔四日景寅孝孫
嗣皇帝臣隆基敢昭告於高宗天皇大帝伏惟繼文纘
聖嗣武居尊保合太和緝熙庶績萬邦作乂百度惟貞
興弔伐之師展對崇之禮無有遠邇罔不率從仁風汪
洋德澤滂沛聖謨超於遠古休聲貫於列辟顧以眇德
纘承丕緒永惟敷佑以致太平頃者玉芝再產玄記陰

隲欽承景命肅事鴻名既刻元辰薦彰嘉應則有慶雲
散彩瑞日重輪恭惟降鑒載深兢惕謹上加尊諡曰高
宗天皇帝大聖皇帝伏惟鑒睠虔誠昭升盛烈祇奉典冊
伏增感慰

中宗孝和大聖皇帝加諡冊

維天寶八載歲次己丑閏六月癸亥朔四日景寅孝姪
嗣皇帝臣隆基敢昭告於中宗孝和皇帝伏惟睿聖日
躋文思天縱重昌大業光啟中興允昭嗣夏之功克荷

續堯之緒武以靖亂文以經邦流愷悌之風布寬和之
政故得三靈叶贊百姓與能庶績咸康彞倫有穆顧以
眇德纘承丕緒永惟敷佑以至太和頃者玉芝再產玄
記陰隲欽承景命肅事鴻名既刻元辰薦彰嘉應則有
慶雲散彩瑞日重輪恭惟降鑒載深兢惕謹上加尊諡
曰中宗孝和大聖皇帝伏惟俯鑒虔誠昭升盛烈祇奉
典冊伏深感慰

睿宗玄真大聖皇帝加諡冊

維天寶八載歲次己丑閏六月癸亥朔四日景寅孝子
嗣皇帝臣隆基敢昭告於睿宗大聖玄真皇帝伏惟濟
哲齊聖文思光澤炳茲龍德潛躍應期靖難安人克昌
休運臻於至道惟懷永圖顧以眇身嗣膺寶命恭惟敷
佑以至太和頃者玉芝再產玄記陰騭是用欽承丕緒
肅事鴻名既刻元辰薦彰嘉應則有慶雲散彩瑞日重
輪恭惟降鑒載深兢惕謹上加尊謚曰睿宗玄真大聖
皇帝伏惟俯睭虔誠昭應盛烈祇奉典冊伏增感慰

赦

加祖宗謚號赦

王者之御天下也莫不懋建皇極惟懷永圖先德禮以
導人用政刑以佐理順四時而並施其化育萬物而各
遂其宜然後闢土開邊遠柔邇悅衆享美利斯為大寧
我國家以仁義有乾坤以道德撫夷夏其高祖太宗經
綸之列聖繼體守持之重光累洽延洪景鑠及於憲考
文明武英剡稂莠於甫田振威靈於殊俗肅清澄廓庶

績其凝實推中興歷十五載今予小子大構是承祇奉
宗祧敬若天命遐慕唐堯恭讓之德常勵漢文菲薄之
躬慄乎憂勤懼忝負荷每念河湟之壤陷為戎寇之疆
百有餘年一失莫復元和中將雪前憤嘗振睿思方除
孽臣未就成業永懷遺訓明發疚心近者祖禰降靈中
外協志不煩攻伐不費財賦六郡連收七闕盡復削衽
解辨樹領乞降犬羊竄亡億兆鼓舞厥庸有功繼志克
成仰襲丕休聊用無愧臣下欲歸虛美強我鴻名斯實

先聖神功因願追尊加謚牢讓乃遂孝思獲申頌告寰
區同茲徽慶且慮蒸黎之困猶疑獄犴之寃爰因獻歲
之辰乃行在宥之典可大赦天下自大中四年正月一
日昧爽以前大辟罪以下已發覺未發覺已結正未結
正繫囚見徒罪無輕重咸赦除之唯犯十惡官典犯入
已贓不在赦限

國忌

國忌在近進蔬菜詔

朕聞大孝塞乎天地，色養著乎人倫。自古迄今，乃生民之本也。朕之不幸，往逢疢疾，未明之間，屢所哀感，舉目歔歔，永懷罔極。追慕之痛，鍾此蕤賓，不樂之辰，繼乎旬朔。宜令外厨斷牲鱗，唯進蔬菜。

增忌辰設齋人數勅

忌辰設齋，雖出近制，斟酌損益，貴於得中。況在不遷之宗，允資異數之禮。五月六日、二十六日兩忌，設齋人數宜各加至二十人。太穆文德皇后忌日，亦各加倍數。其

寺觀仍舊十二月八日忌宜於五所寺觀共設四十人

宜令所司准式

太和年

廢國忌日行香勅

朕以郊廟之禮嚴奉祖宗備物盡誠庶幾昭格恭惟忌日之感所謂終身之憂而近代以來歸依釋老徵二教以設食會百辟以行香將以仰助聖靈而竇福祐有異皇王之術頗乖教義之宗時因崔蠡奏論遂遣討尋本末禮文令式曾不該明習俗因循雅當釐革京城及天

下州府國忌日於寺觀設齋行香起今以後並宜停廢

開成四年
年十月

唐大詔令集卷七十八

欽定四庫全書

唐大詔令集卷七十九

宋 宋敏求 編

典禮

巡幸

幸故宅改為通議宮曲赦京城繫囚制

巡幸岐隴二州曲赦

巡幸并州曲赦

破契丹幸靈州詔

赦行幸諸縣及岐州制

幸東都詔

睿宗令皇帝巡邊詔

行幸東都詔

幸新豐及同州勅

幸東都制

至都大赦天下制

巡幸東都賜賚扈從赦天下制

幸長安制

幸東都詔

將離東都減降囚徒勅

北巡狩制

幸太原府赦境內制

北路幸長安制

南路幸長安制

巡幸東都賜賚從官勅

南路幸西京勅

鑿駕到蜀大赦制

史思明再陷洛陽巡幸東京詔

巡幸

幸故宅改為通議宮曲赦京城繫囚制

朕恭膺大寶克隆景祚永言孝思聿追罔極肇惟自昔
胥宇舊居王道所基積慶攸在桑梓之敬每懷踐歷日

不暇給以迄於茲今既氛祲廓清區夏寧謐時和歲稔
民休俗泰爰擇良辰言遵邑里體同過沛事等歸譙故
老咸臻族姻相會肅恭薦享感慶兼集思俾歡心逮於
衆庶愍茲幽滯有懷寬釋都輦之地宗祊所居作固萬
邦義越等常惟時孟夏方申長育宜順天心宣茲惠澤
可曲赦京城內繫禁囚見徒及被推問應集之人死罪
以下並放免其內有於政切害情理難原者宜降死從

流

武德六年四月

巡幸岐隴二州曲赦

朕恭膺寶命握圖馭歷屬喪亂之後承凋弊之餘宏宣
德化勵精治道遐邇肅清要荒來服聊因暇務省視民
風遵彼岐梁言臻汧渭百年之老俱稱鼓腹五尺之童
咸欣擊壤睠懷曩昔亟遊此地歲月踰邁以迄於茲周
覽原隰愴然懷舊延問鄉黨僚吏猶存事異宛譙情均
豐沛民和俗阜上下歡洽宜宣愷澤俾同慶幸可特赦
岐隴二州管内自貞觀四年十月一日昧爽以前大辟

以下悉從原有放免二州戶民無出一年租賦八十以
上鰥寡篤疾及舊任二州雜職佐吏以上賜物各有差
百歲以上就加優恤行經咸陽始平武功二縣見囚禁
徒罪以上各降一等杖罪以下並宜釋放年八十以上
及鰥寡篤疾并武功縣舊主軍師亦加賜物凡此界內
名山大川望秩之禮備加牲幣孝子順孫義夫節婦隨
事褒顯旌表門閭其賜物之有差宜依別勅務從周厚
以稱朕意

巡幸并州曲赦

太原之地興運所階全晉之人義深惟舊自朕恭膺寶
歷二紀於茲何嘗不御宸長懷想靖陵之風雨臨軒遠
感念大麓之雲雷當於此時乃忘身而拯溺實賴同德
並贏糧而樂推役不踰年遂清區域諒由成都之衆謳
訟闡虞帝之功戰牧之徒歌舞興周王之業仗茲叶力
竟致升平懷彼勤勞何忘晷刻既因垂拱之暇再省創
業之方周歷郊原宛如疇昔訪其父兄已多長謝不見

所識魏后遂以興嗟卹彼故里漢皇因而式宴前王是
日哀樂交懷在朕深衷義符於此是用具陳廣樂共申
高宴取譬還譙之賞同彼幸代之情仍曲赦并州管內
大辟罪以下繫囚見徒並赦除之常赦所不免者不在

赦例

貞觀二十
年正月

破契丹幸靈州詔

朕形勞育物盡敬承天蠢動不安櫛風而罔倦荒隅未
靜救焚而靡息獨運方寸貫徹上玄凝想冕旒布化中

外是知惟天為大合其德者弗違謂地蓋厚體其仁者
光被故能彌綸八極權輿二儀大帝福謙斯其效矣彼
匈奴者與開闢以俱生奄有龍庭共老上而並列僭稱
驕子分天街於紫宸仰應旄頭抗大禮於皇極流殃構
禍數歲稱兵憑陵障塞連年壓境射雕馳騎亟飲灞川
如豕騰氛頻驚渭汭貽先皇之動眾致黎庶之塗原社
稷為虛軫情何已朕御天下二紀於茲曩者聊命偏師
遂禽頡利今茲始弘廟略已滅延陀麾駕出征未踰郊

甸前駟所轡才掩塞垣長策風行已震金微之表揚威
電發遠踰沙場之外遂使雁山之北無侵單于龍庭之
南大開封域其契苾車心俟斤及鉄勒諸姓迴紇朝祿
俟利發等總統百餘萬戶散處北溟遠使人委身內屬
請同編列並為郡縣引領翹足暴十日而佇油雲延首
求哀沉九泉而請營魄朕當暫幸靈州撫輯歸附弘茲
肆赦加以施行頒惠天隅耀威雲朔收其瀚海盡入提
封解其紛爭並垂冠帶混元以降殊未前聞無疆之業

永貽來世古人所不能致今既吞之前王所不能屈今
咸滅之斯寔書契所未有古今之壯觀豈朕一人獨能
宣力蓋由上靈儲祉錫以太康宗廟威靈成茲大定即
宜宣禮告於清廟仍以大慶頒示普天俾與黎元同茲

有賴

貞觀二十
年八月

赦行幸諸縣及岐州詔

朕恭膺寶命嗣奉瑤圖居萬乘之尊當四海之貴遐觀
往烈詳求前古每希蹤於括后常勞心於庶物兢懼弗

寧憂勤若厲屬天下無事區宇有截仰高風於汾射暫
清暑於林泉朕昔在震宮侍遊茲壤山川依舊歲月不
追今既俗阜年和華夷胥悅緬懷徽範情兼感慰宜遵
省方之義且順陽和之序曲申惠澤式彰寬宥行幸所
經諸縣及岐州囚徒人犯罪者流降從徒以下並免之
永徽五
年二月

幸東都詔

咸京天府地狹人繁百役所歸五方胥萃雖獲登秋之

積猶虧存歲之資。曠言於此，思蠲徭賦，夫以交風與壤，測景神州，職貢所均，水陸輻湊。今茲豐熟，特倍尋常，事貴從宜，實惟權道。即以來年正月，幸東都關內百姓，宜免一年庸調及租并地丁稅草。其當道諸縣，特免一年。劍南隴右諸州，每年供進物一二年，且停。儀鳳二年十月

睿宗令皇帝巡邊詔

先王省方，所以觀風設教。聖人順動，所以刑清。昉服故叶時，同律虞典之常道。喬岳翕河，周家之盛德。自玉風

不競茲禮遂闕兩漢之朝有時于邁三國以降日不暇
給我皇家開元首出卜代重光寰宇大寧車書無外文
祖神宗之德洽於兆人考祥展義之規昭於國典朕祇若
丕構寅奉慶靈夙懷箕嶺之心久遂汾陽之志皇帝天
錫英武神與聰明純孝極於安親大功深於濟代自陟元
后實總朕師時政益明彛倫攸叙而將靖邊氓藩阻悠遐
夷夏殊化或幽隱未申或勞苦未卹將副來蘇之懷實允
卜征之義加以頃年邊將授任或乖師律以虧軍威不振

皇帝宜順時巡狩親幸邊陲掌圖修考事之儀典樂具陳
詩之禮西洎河塞東踰燕朔望秩名山肆覲羣后休農問
老誓師訓卒其有牧州典郡功施於人仗節擁旄隱若敵
國者當崇進律之賞加以分麾之命若邦政不舉軍令莫
修哀歛細人侵削戰士者明茲典憲肅以天誅然後七萃騰
裝六軍按節合符釜山之曲覽軒轅之遺風勒銘單于
之臺踐漢皇之故事使陰山罷祲大漠無塵其供帳所
資儲擬之費皆令有司支備州縣不得勞百姓

先天元年十月

行幸東都詔

咸洛京師建都惟舊乃睦時邁卜征在斯朕承天纂歷
恭已臨人鼎俎雖甘念疲眊之不足宮室信美傷浮戶
之未安事內攢於千慮心外周於萬方則知帝業初啟
峭函乃金湯之地天下大定河洛為會同之府周公測
景是曰土中為六氣之所交均萬方之來貢引魚鹽於
淮海通航紆於吳越瞻彼洛汭長無阻饑自崇入闕於
今八載省方之地久而莫修遂使水漕陸軌方春不息

勞人奪農卒歲何望闕東嗟怨朕實聞焉思欲寧人而
休轉運館穀而就教庾加以暑雨作害災拂秦川歲星
有福祥歸豫野朕情深救弊身豈懷安夷考衆心審聽
輿誦上奉天以為孝下利人以為忠順時而動從衆之
願宜以今年十一月行幸東都凡厥有司式遵乃事至
於行從兵馬供頓貯積務在樽節勿使煩勞考使選人
咸令都集東都宮殿應須修理量加整葺不得煩人朕
本為人而行非擬勞人自奉所過州縣無費黎元亦不

得輒有差科傍求進獻宣布遐邇知朕意焉

先天二年七月

幸新豐及同州勅

勅虞之四朝且徧區寓漢之三輔本同京師善於古者考於今發乎近者應乎遠若順豫之事缺則紊於王制巡遊之典備則慮於人勞朕受命膺期勵精設教幸乾坤幽贊風雨咸若百姓既阜三農已登同穎獻於宗廟穠穗生於郡國我無大桀寔欣於歲取人有小康未果於時邁但左翊之地近入黃圖新豐之邑甫鄰青綺山川

宮館咫尺相望方欲過灞亭而涉澗經沙阜而臨渭見
彼耆耄問其疾苦察長吏之政恤黎甿之寃蓋所以展
義陳詩觀風問俗始自畿甸化於天下宜以今月二十
五日幸長春宮停五日緣頓所須並令所司支備一事
以上不得擾州縣發日唯量將飛騎行更不須別遣兵
馬及妄有科喚朕此行之處不得進奉在路有稱寃苦州縣
不能疏決者委御史金吾收狀為進各勉所職副朕意

馬

開元二年九
月十一日

幸東都制

黃門朕聞遂物之宜上則聽其和樂違人之欲下則生
於怨思一物安可不遂萬人安可固違且先王卜征觀
乎風俗大易順動應乎天地由是巡以五載尚徧於人
寰設為兩京况稱於帝宅東幸西顧乃其常也然以行
必清道不為無事至而供帳是則有勞故恤人之隱憂
人不足於今四年矣遂使東土耆老傾心而僕子中朝
公卿屢言以沃朕咸謂國之中洛王者上地均諸侯之

賦當天下之樞陸行漕引方舟繫軟費省萬計利踰十倍更知夫便於物者非自奉以懷安嗟於人者豈不識而阻願於是乎見品彙之阜因京城之餘則無奪農矣陳太師之言獻史臣之頌則無缺政矣信可以備法駕乘陽春歸於成周布我時令宜以來年正月五日行幸

東都仍取北路所司准式主者施行

開元四年十一月三日

至東都大赦天下制

黃門周宅中土秦里上田皆王者之都也時邁觀風載

巡展義皆王者之政也朕嗣守宸極頓移年所冕旒而
視心每周於萬邦車轍所屆迹不出於三輔豈懷安以
憚勞若省費而體力然以設京師者不偏于西據奉宗
廟者亦俟於東征安可阻從人之心增僉予之怨是用
闡陽發歲練日簡辰順和氣以應物御惠風以行令永
言告至載叶俾來顧茲非躬畏此鴻業下輦而有宮室
即舊不加登臺而有山川覽今猶昔森言在日用軫於
懷思弘遠圖俾作寬典不忘師古之義特布惟新之渥

可更大赦天下自開元五年二月三日昧爽以前大辟
以下罪無輕重已發覺未發覺已結正未結正繫囚見
徒常赦所不原者咸赦除之謀反大逆不在赦限

云云

夫政欲清靜詞尚省要間者思致於義未臻其道文書
盈几閣而吏益欺詔命下閭里而人莫諭得非失於抵
牾弊在頗蕪耶簡而易從禁則難犯令式格勅有不便
者先令尚書省集議刑律判定宜詳閱厥衷合於大體
亡命山澤挾藏軍器百日不首復罪如初敢以赦前事

相告者以其罪罪之赦書日行五百里布告天下稱朕意
焉主者施行

巡幸東都賜賚扈從赦天下制

朕自臨天下未至於洛雖二京出遊蓋惟常典五載來
巡肇於即事念茲扈從特有加恩南北衙應從官三品
以上各賜物四十段四品三十段五品二十段六品七
品十五段八品九品十段從飛騎萬騎各賜物五段馬
家小兒賜物三段三衛檢校監門直長引駕等發京宿

衛執當不闕者簡日優量其置頓營幕橋道等使並制
官各賜物遞加從官一等仍與中上考緣路刺史上佐
縣令奉承頃事并專知官各准從官例與賜亦與中上
考衛士掌閑幕士等各賜物兩段大赦天下惟謀反大
逆不在赦限餘並宥之河南府百姓給復一年河北遭
滂及蝗蟲處無出今年租武德貞觀以來勲臣子孫無
名在位更詳求其後奏聞有嘉遁幽棲養高不仕者州

牧各以名薦

開元五年五月

幸長安制

門下觀俗省方所以愛人治國宗尊廟貌所以事神享
親欽若昔典此惟大義朕祇膺鴻業積念咸秦去歲欲
幸洛京已發成命屬重營天室因將中止誠以其繩則
板功且未即展鈴効駕信弗可違終肆覲於東方恒載馳於西
土流晷不駐通喪永畢象居始成如在增慕朕之前志
日夜匪遑故可以詩陳肅雖禮極禋祀神明之隩時惟
雍州禾稼有年莫若闕輔王假用吉后来其蘇寔獲我

心俾從人欲可以今年十月取北路幸長安所司准式

務在節省無得勞費主者施行

開元六年七月六日

幸東都詔

王者觀俗以賦政考祥以省方必將叶於人和而奉若天意朕祇守鴻緒用康黎庶思振德以惠物豈勞人以尊已頃年闕輔之地轉輸寔繁重以河塞之役兵戎屢動千金有費九載未儲懷此勞辛以增旰昃且夫苟利於物可隨事而變通將適於人故因時以巡幸卜洛萬

方之隩維嵩五岳之中風雨之所交舟車之所會溝通
江漢之漕控引河淇之運利俗阜財於是乎在今欲省
其費務以寔闕中即彼教倉少濟河邑乘歲陽之吉展
遊順之儀豈惟龜筮不違固已詢謀定是叶修五禮更
問百年車輿動而不勞玉帛會而胥悅所謂先天以弘
道因人以為利也宜以明年正月十五日幸東都

開元九年

九月
九日

將離東都減降囚徒勅

獻歲肇春陽和感氣且是發生之日寔惟布德之辰朕
將幸秦京言離洛邑既省方以觀俗思弘恩以濟人載
念狴牢又惻襟抱宜敷寬大之恩用敦祝泣之意其都
城內見蓄徒除身犯十惡及偽造頭首餘雜犯死流等
各減一等徒以下並放河南府遭水百姓前令量事賑
濟如聞未能存活春作方興恐乏糧用宜令王怡檢問
不支濟者更量賑給務使安存

開元十一年正月

北巡狩制

朕爰自京洛有事省方乘茲發生之和因務豫勤之慶
將欲恤鰥獨問耆老陳詩展禮陟幽黜明使滯伏必申
微物咸遂其行幸所至處宜令刺史縣令存問百年老
病鰥寡惻獨及行人家如有單貧不濟不能存活者量
加賑給其侍老仍各賜物三段見禁囚徒除十惡及身
犯反逆并偽造頭首以外自餘雜犯流死等罪各減一
等徒以下並放免百姓有賢良官人清白並令中書門
下採訪名聞其貪濁之吏委御史覺察彈奏

開元十一年正月

幸太原府赦境內制

朕恭承寶位十有餘年荷累聖之昌圖膺三靈之眷命
日慎一日雖休勿休今問俗觀風肆覲羣后陳詩納貝
親問百年雖念勞人事資展禮太原舊國王業所興乃
瞻成周西巡豐鎬曰惟嗣漢東至沛鄉皆會彼舊都瞻
茲粉社况興王始封之地鴻圖創業之初含育生靈大
造區宇永惟丕構顧慙貽厥且地稱用武戎役是殷爰
錫懷舊之恩以順發生之澤其太原府境內見禁囚徒

除十惡及偽造頭首餘並赦免預宴官共賜物二千疋
父老及人吏等共賜一萬疋百姓宜給復一年九等戶
給復三年元從家給復五年其家籍見丁終身免征役
侍老八十以上賜物五段版授上縣令仍賜緋婦人版
授上縣君九十以上賜物七段版授上州長吏仍賜緋
婦人版授郡君百歲以上賜物十段版授上州刺史仍
賜紫婦人授郡夫人孝子順孫義夫節婦旌表門閭終
身勿事其有流淪草澤抱德栖遲及武德功臣并舊戚

子孫才堪文武未有官者并壽縣搜揚具以名薦

開元十一年

年正月

北路幸長安制

朕粵自鄴鎬省方溼洛屬九服寧謐四時順成殊微龐
殷景福紛委遂荷靈暱登於介丘居厥成功允荅休祐
蓋敬天之命不敢以寧也我來於東歲亦數稔而西土
耆老僊予多怨况闕輔之地比則有年宜叶卜征之祥
式展時巡之義可以今年閏九月十日取北路幸長安

所司准式緣頓支供一事以上並用當處官物不須科
歛百姓其遞運及行從官寮等務從減降所在公私不
得輒有進獻宣布遐邇知朕意焉

開元十五年六月

南路幸長安制

朕君臨區寓子育黎獻每思勤恤不欲勞煩而鎬京之
地陵寢所在自展義河洛已歷歲年所以式遵卜征有
事時邁抑惟恒典寧敢憚勞將欲西巡元取北路今同
州有暴水浸於邑居載懷憂惕無忘監寐且從南路幸

長安所司准式

開元十五年八月

巡幸東都賜賚從官勅

出震奮豫本乎觀風省方展義期於利物朕志惟忘已
情期順人爰採謠歌式事巡幸自轉蹕西鎬即宮東周
景暖風恬無凜冽之慘烟和氣淑嘉晏溫之色得夫軍
衛衆護靡有郊塞之虞豈非龜筮允臧堪獻卜征之吉
天人叶應僉予玉城感是休和良以有慰思弘慶澤從
行在所親王賜物八十疋嗣郡王六十疋一品五十疋

三品四十疋四品三十疋六品二十五疋七品二十疋
八品九品十段三衛引駕細引飛騎各四段曠弩手幕
士主膳供膳及諸色白身人等各三段知頓使知營幕
使各六十疋知頓御史三十疋知驛御史及知頓判官
知營幕官賜各加一等入仗突厥吐蕃使共賜物五百
疋令鴻臚據蕃望高下節給分付供頓州百姓所據緣
頓差科及充夫匠雜役供應等人宜放今年地稅自餘
戶等免今年地稅之半應定名供頓縣官各與一中上

考開元十九
年十一月

卷七十九

南路幸西京勅

勅朕所時邁皆順物情頃屬關輔無年遽爾東幸固非
為已將以息人今百穀既成庶務皆省而五陵所奉誠
在京師安可更留周南有闕時薦宜以來年正月七日
取南路幸西京所司准式應緣行幸所須務從減省所

由明為條例勿使勞煩

開元二十
三年十月

鑾駕到蜀大赦

朕以薄德嗣守神器何嘗不乾乾惕厲勤念蒼生至於
水旱或乖則禱祠請罪邇鄙微擾則齋戒思過聿來四
紀人亦小康蓋祖宗之靈卿大夫之助也是以推心將
相不疑於物而奸臣兇黨負信背恩割剝我黎元暴亂
我函夏皆朕不明之過豈復尤人哉揚國忠厚歛害時
已肆諸原野安祿山亂常構禍尚逋其斧鉞朕用巡巴
蜀訓厲師徒命元子北畧朔方諸王分守重鎮合其兵
勢以定中原將蕩滌煩苛大革前弊思與億兆約法惟

新上以安宗廟神祇下以寧華夷動植可大赦天下其
天寶十五載八月一日昧爽以前大辟罪以下常赦所
不免者咸赦除之自中興以來有破家者一切與雪流
人一切放還左降官各還舊資內外文武官節級賜階
爵安祿山脅從官有能改過自新背逆歸順並原其罪
優與官賞

史思明再陷洛陽巡幸東京詔


昔昆夷作患周宣興薄伐之後陳豨稱亂漢祖發親征

之師蓋所以禁暴除兇取威靖難上以保宗社下以拯
黎元古帝先王茲道無替頃者祿山構逆背義負恩惡
既貫盈尋已殄滅而思明殘寇尚敢延妖聚其蜂蠆之
餘邀我雷霆之伐朕以干戈屢動黎庶未安由是按兵
延誅冀其來格而乃竊兵干紀自取滅亡副元帥光弼
糾率銳徒恭行天罰爰啟絳宮之畧克推青犢之師曾
未浹辰大破兇黨此皆穹昊垂祐宗社降靈是以戎律
用貞禍淫斯在如聞蓬艾之下蚊蚋猶虞固當乘破竹

以追奔同燎原而撲滅朕為人父母深念塗炭是用大
整戈矛方申弔伐撫綏河洛以致和平即以今月十七

日幸東京率六軍取路進發

乾元二年九月



唐大詔令集卷七十九